

# UMS komited bentuk, lahir generasi berjaya

DE 27.11.2014 6  
Larissa Lumandan

**KOTA KINABALU:** Universiti Malaysia Sabah (UMS) berjanji untuk terus komited bagi membentuk selain melahirkan generasi akan datang yang berjaya.

“Pendidikan dilihat sebagai satu platform penting kepada pembangunan modal insan cemerlang yang merupakan penggerak utama kepada pembangunan arus perdana,” kata Naib Canselornya, Profesor Dr Mohd Harun Abdullah.

Beliau berkata demikian semasa penyampaian Anugerah Pascasiswazah bertema “Kejayaan sebagai Transformasi Kecemerlangan” di Dewan Canselor universiti di sini, Rabu.

Beliau menjelaskan peranan sebuah universiti terutamanya UMS adalah untuk melahirkan pemimpin masa depan bagi meneruskan legasi kecemerlangan negara berdasarkan jati diri Malaysia.

“Kita perlu berani melakukan perkara di luar kebiasaan dan memberi nafas baharu dari segi budaya akademik kita.

“Sepanjang proses ini, banyak usaha dibuat oleh universiti dalam kalangan penuntutnya, contohnya, pembabitian dan kerjasama dengan pihak industri untuk meningkatkan potensi penyelidikan kami,” katanya, menambah penuntut melaluinya dapat mendapat keputusan penyelidikan cemerlang.

Selain itu, Harun berkata rangkaian mereka dengan universiti penyelidikan lain juga akan membantu UMS bergerak ke arah kecemerlangan



**BARISAN penerima Anugerah Pascasiswazah 2014.**

dalam bidang penyelidikan.

“Penuntut harus dapat memanfaatkan rangkaian kami dengan universiti-universiti ini,” katanya, menambah mereka kini bekerjasama dengan lima universiti penyelidikan di Malaysia untuk meningkatkan output serta kualiti dari segi penyelidikan di samping penerbitan.

Pengambilan penuntut pascasiswazah dari seluruh dunia serta Malaysia juga membolehkan penuntut didedahkan kepada cara pembelajaran yang lebih dinamik serta mewujudkan satu persekitaran kompetitif dan mencabar.

Penuntut UMS, katanya, juga mampu mencapai tahap sama seperti penuntut antarabangsa dan berdasarkan statistik 2014, seramai 38 pascasiswazah mengambil bahagian dalam persidangan tempatan dan 10 lagi dihantar ke persidangan antarabangsa.

Beliau juga berkata, ada antara mereka yang memenangi anugerah daripada persidangan yang mereka hadiri tahun ini termasuk

‘Penyampaian Lisan Cemerlang’ oleh Chan Pei Teng di Phuket, Thailand, ‘Penyampai Terbaik’ oleh Abdul Majid di Australia dan lain-lain.

Harun menyatakan, pada 2013, 56 peratus daripada siswazah UMS memulakan laluan kerjaya mereka secara tempatan dan antarabangsa dalam tempoh beberapa bulan selepas tamat pengajian.

“Tahun ini, seramai 589 penuntut pascasiswazah dan PhD menerima ijazah mereka dan jumlah ini menunjukkan peningkatan cemerlang dengan usaha universiti untuk melahirkan siswazah berpendidikan tinggi,” katanya.

Majlis itu juga menyaksikan seramai 72 penuntut pascasiswazah menerima Anugerah Aspirasi Pascasiswazah sementara 20 lagi menerima Anugerah Tesis Sarjana dan PhD Terbaik, Anugerah Pelajar Cemerlang untuk Penyelidikan dan Kerja Kursus, Anugerah Pelajar Terbaik (Kerja Kursus) Mengikuti Program serta Anugerah Penyelia Terbaik.